

## DOMENIE XI «VIE PAL AN»

### Antifone di jentrade cf. Sal 26,7.9

Scolte, Signôr, la vôs dal gno berli.  
Tu sêts tu il gno jutori:  
no sta parâmi vie,  
no sta bandonâmi, Diu de mî salvece.

### Colete

Diu, fuarce di chei che in te a sperin,  
scolte ben disponût lis nestris preieris,  
e, stant che cence di te la debolece dai oms no pues propit nuie,  
danus simpri il jutori de tô gracie  
par che o metìn in vore i tiei comandaments  
e ti plasìn tes intenzions e tes oparis.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Ez 17,22-24

O ài alçât l'arbul bas.

Dal libri dal profete Ezechiel  
Il Signôr, gno Diu, al dîs cussì:  
«O cjolarai dal ramaçut di cedri  
dome la sô ponte,  
i distacarai dome une pontute  
e le plantarai jo  
suntune mont alte e boschive.  
O vuei plantâle  
su la mont alte di Israel  
e e slargjarà i ramaçs e e frutularà  
e e deventarà un cedri ben foltît.  
A laran a sotetâsi ducj i ucei  
e dut ce che al svole al larà a ricreâsi te ombrene des sôs fueis.  
Ducj i arbui de campagne a ricognossaran  
che jo, il Signôr,  
o ài sbassât l'arbul alt  
e alçât chel bas,  
o ài fat secjâ il len vert  
e menâ chel sec.  
Jo, il Signôr, o ài dit cussì e cussì o fasarai».«  
Peraule di Diu.

### SALM RESPONSORIÂL dal Salm 91

R. Fâs cressi in nô, Signôr, la semence de tô peraule.

Al è biel laudâ il Signôr,  
fâ une cjante al to non, Altissim,  
contant il to boncûr a buinore  
e la tô fedeltât gnot vie. R.  
I juscj a florissin come palmis,

a veginin sù come i cedris dal Liban;  
riplantâts te cjase dal Signôr,  
a florissin tai andits dal nestri Diu. **R.**

A butaran parfin te lôr vecjae,  
a restaran frescs e vivarôs,  
par contâ che il Signôr al è just, la mè crete,  
e che in lui no 'nd è ombre di injustizie. **R.**

### SECONDE LETURE 2 Cor 5,6-10

Le metîn dute, sedi che o vivìn tal cuarp sedi che nus tocji di saltânt fûr, par plasêi al Signôr.

De seconde letare di san Pauli apuestul ai Corints

Fradis, o sin simpri plens di coragjo, e savint che fin che o sin tal cuarp o sin esiliâts lontans dal Signôr, parcè che o lin indenant te fede e no ancjemò te vision, o sin plens di fiducie e o preferin lâ in esili dal cuarp e vivi dongje dal Signôr. Par chel le metîn dute, sedi che o vivìn tal cuarp sedi che nus tocji di saltânt fûr, par plasêi a lui. Di fat ducj o vin di presentâsi denant dal tribunâl di Crist, par cjakâ ognidun la ricompense des oparis fatis cul cuarp, tant in ben che in mâl.

Peraule di Diu.

### CJANT AL VANZELI cf. At 16,14

**R.** Aleluia, aleluia.

Vierzinus, Signôr, il nestri cûr

e o rivarîn a capî lis peraulis di to Fi.

**R.** Aleluia.

### VANZELI Mc 4,26-34

Al è il plui minût di dutis lis semencis, ma al devente plui grant di dutis lis jerbis.

Dal vanzeli seont Marc

In chê volte, Jesù al diseve a la int: «Il ream di Diu al è propit cussì: come un om che al à butade la semence tal teren, e po al duar e al vegle, di dì e di gnot, intant che la semence e bute fûr e e cjape pît cence che nancje lui nol sepi cemût. Il teren al bute di bessôl prime jerbe, po spi e po tal spi il forment sglonf. Cuant che po il prodot al è madûr, si spessee a meti man a la sesule parcè che e je rivade l'ore di seselâ».

Ur diseve ancke: «A ce podîno meti a pâr il ream di Diu? O ben: cun ce paragon podîno figurâlu? Al è come un grignel di senape che, cuant che al ven semenât tal teren, al è il plui minût di dutis lis semencis che a son su la tiere; ma, une volte semenât, al cres e al devente plui grant di dutis lis jerbis e al bute fûr ramaçs tant grancj che i ucei dal cîl a puedin lâ a parâsi sot de sô ombrene».

Cun tantis parabulis come chestis ur predicjave la peraule, seont che a jerin in stât di capîle, e cence parabulis no ur fevelave; ma dopo, ai siei dissepui, ur sclarive dut a part.

Peraule dal Signôr.

### Su lis ufiertis

Diu, che cun chescj regâi dal pan e dal vin  
tu nudrissis la gjernazie umane  
e tal sacrament tu le fasis tornâ gnove,  
fâs, par plasê, che no nus mancji  
chest sostentament dal cuarp e da l'anime.  
Par Crist nestri Signôr.

### Antifone a la comunio Sal 26,4

Une robe i domandi al Signôr e dome cheste o brami:  
di stâ te cjase dal Signôr ducj i dîs de mè vite.

**O ben: Zn 17,11**

Al dîs il Signôr: Pari sant, tenju cont tal to bonvolê  
chei che tu mi âs dât, par che a sedin un come nô.

**Daspò de comunion**

Cheste sante comunion che o vin ricevude, Signôr,  
come che e je spieli de unitât dai fedêi cun te,  
cussì e rivi a dâ dongje inte unitât la tô Glesie.  
Par Crist nestri Signôr.